




КАЗІРГІ
ҚАЗАҚ
ПОЭЗИЯСЫ

К232

т84

Нағашыбай Мұқатов

Жанынан
жасыл
жапырақтары





Нагашыбай Мұқатов

*Накшебін
жасын
жапирактары*

Өлеңдер

047359 -

Л. Толстой атындағы Костанай
облыстық әмбебам ғылыми
Ш Алматы кітапханасы
«Жазушы»
2004

15232
ББК 84 қаз 7-5
М 84

*Қазақстан Республикасы Ақпарат министрлігінің
байдарламасы бойынша шығарылып отыр*

М 84

Мұқатов Н.

М 84 Жанымның жасыл жапырақтары: Өлеңдер.—
Алматы: Жазушы, 2004.— 200 бет.

ISBN 9965-701-54-7

Нағашыбай Мұқатовтың бұл кітабындағы өлеңдер Тәуелсіз Қазақстан, достық, қазақтың қасиетті жерлері туралы сыр шертеді. Адамгершілік, парасат, кісілік қасиет төнірегіндегі толғаныстар ойландырлық. Ақынның жаңа белесіндегі тың туынды өз оқырманын табар деген үміттеміз.

М 4702250202-082 құлактандырусыз — 2004 ББК 84 қаз 7-5
402(05)-04

ISBN 9965-701-54-7

© “Жазушы” баспасы, 2004

ҚАРАПАЙЫМ ҚАЗАҚТЫҢ БІР ҰЛЫМЫН

Көкіректе үні кең дүние дүбірінің,
Күміс сөуле құйсынышы күні бүгін.
Өр үмітпен өрлеген өлең-тауға
Қарапайым қазақтың бір ұлымын.

Жапырағын жайды ма бала-бұтак,
Табиғат-ана айрықша қанатына ап.
Байлық маған, доллар да, теңге де емес,
Байлық маған — жазылған жаңа кітап.

Жалған өмір табар ма жүрек емін,
Табан жолдан табылmas тілегенім.
Шаттық маған шалқайып жүрген емес,
Шаттық маған — шабытты бір өлеңім.

Жылмен жүйткіп жауқазын ән-күндерім,
Жырым, сірә, жауатын жаңбыр ма едің?!
Қызық маған шетелдік машина емес,
Қызық маған — жаяу доспен сан күлгенім.

Ақын ғана арқалар ғасыр жүгін,
Ағайыннан сырларын жасырды кім?!
Арман маған жиятын дүние емес,
Арман маған — ак қанат асыл жырым.

Адамдарды керек қой асқақ тану,
Жоспарымда жоқ тіпті басқа от жағу.
Мақсат маған шарапқа шалқу емес,
Мақсат маған — мейірімге мас боп қалу.

Өзегімді қақ жарып өтті намыс,
Өмір бойы өзендей көп тұнамыз.

Тірлік маған атысу, шатысу емес,
Тірлік маған — кең құшақ, тек қуаныш.

Қызыл таңнан қырымда құлпырамын,
Сөз өнері сүп-сұлу гүлді бағым.
Үріс маған бір жылдық бидай емес
Үріс маған — мың жылдық ынтымағым.

Емірене қарайды елге аспаным,
Көрмейін жер сілкініп, сен тасқанын.
Бақыт маған байып ап өлген емес,
Бақыт маған — кедей боп жер басқаным.

Лебіз деме әсте де сыңар жақтау,
Пенделердің бәріне ұнар мактау.
Парыз маған атымды шығару емес,
Парыз маған әке атын кіл ардақтау.

Көкіректе үні кең дүние дүбірінің,
Күміс сәуле құйсыншы күні бүгін.
Өр үмітпен өрлеген өлең-тауға
Қарапайым қазақтың бір ұлымын!

АСТЫМДА АҚИҚАТТЫҢ АҚ ТҰЛПАРЫ

Желдей есіп жетсем де жастан-жасқа,
Сыр-сандығын көп кісі ашқан босқа.
Елпілдеп ереді кіл сәби-көніл
Дүшпан бар десе сенбей достан басқа.

Бойыма бабалардан бір ән қонып,
Беті сұлу болашақты тұрам көріп.
Жақсылық құсын ылғи ұшырсам да,
Жамандық ирелендер жылан болып.

Самғарда алға сүйрейді күш арынды,
Арман бар ма адамда ісі алымды.
Арқамда асыр салған алатајқ
Айқара ашып жүргенде құшағымды.

Арасы алшақ өмәнда ақ, қараның,
Топас тобыр табанға таптағаным.
Көзімше көп мадақтап, көшік қойып
Сыртымнан сөз қылғаннан сақтанамын.

Мен де бір перзенті ғой маң даланың,
Қазактың қара сөзі — қанбағаным.
Анамның аппақ сүтін ішкендіктен,
Адамдық адал жолдар таңдағаным.

Адамды адам ұғыну қын өлі,
Тойдан гөрі дауға тез жиылады.
Өзегімді өртеме өкініш-өрт
Бір-ақ ғұмыр мандайға бүйырары.

Інілерім ізетті жүр жағалап,
Шытырман тағдыр шынымен шындаған-ақ.
Үйренгенмін жүруге тура жолмен,
Үйренгенмін сөйлеуге тура қарап.

Шаршатты-ау шындық үшін аһ ұрғаным,
Ес білгеннен ел сөзін макұлдадым.
Астымда ақиқаттың ақ тұлпары
Сүттен ақ, судан таза ақын-жаным.

ТАБИФАТҚА ТӘҢІРДЕЙ ТАБЫНАМЫН

Ашылғанда айқара саумалға құшак,
Топырағыма киелі аунар ма бір шақ.
Тұнжырасам төменмін төбелердей,
Куанғанда тұрамын тауларға ұқсан.

Бәрі кілем сияқты қырат, қырдың,
Жабырқасам жаңбырша жылап тұрдым.
Тебіренген кезімде теңізбін де,
Еміренген кезімде шуақ күнмін.

Жібі үзілме ғұмыры үміттердің,
Жүйткі ілгері жүйрігі жігіттердің.
Жаным менің жайдары — жасыл желек,
Туғанымнан тап-таза тұнық көлмін.

Шегірткені қуғанмын сай жағалап,
Сүйретіліп бармаған қайда балак.
Ақ қағазға жырымды жазбас бұрын
Аллатагалаға сиынам айға қарап.

Көзден ұшып кетсінші көп уайым,
Тамылжыған төңірек толы қайың.
Жұлдыз-бақыт жоғалма тас төбемнен
Жанталаса нұрыңа шомылайын.

Қаңтар емес, шілде іздер әлі жаным,
Қарапайым қатардан табыламын.
Еңісте өскен еркелеу егіз едім
Табиғатқа тәнірдей табынамын.

ЖАНЫМНЫҢ ЖАСЫЛ ЖАПЫРАҚТАРЫ

Ізыңынан желдің ырғалғанында,
Үлдиы, қыры нұрланғанында.
Жаңа дүние жаратылғандай,
Бұтақтың басы бүр жарғанында.

Шымшитын аяз шаршатқанында,
Шуақты аппақ аңсатқанында.
Созғанда қолын жап-жасыл желек,
Сәбидің бейне саусақтарында.

Қозғалған керуен жасыл ма көшкен,
Құбылған қоғам ғасырға ілескен.
Көктеген жапырақ балбебектердей,
Күн анасының қасында өскен.

Жұпар иіске жүгіре берген,
Жолықса жолдан гүлді де тергем.
Жапырақтарға жалт қарағанымда
Тірі деген сөз тіліме келген.

Сарғайып жеттім сағынғаным,
Күрт көктеу керек жалын-жаным,
Тамырим менің табысқандай-ак
Теректің терең тамырларына.

Ағын сулардан татып ап бәрі,
Аңқасы кепкен атырап тағы.
Жанарым жайнап, жайылғандай ма
Жанымның жасыл жапырақтары.

ЕНДІ КІМГЕ СЕНЕМІН

(*Көңіл қүй өлеңі*)

Сырым емес, жасырар, мұңым емес, бір күнгі,
Күншуаққа құлшынсам, көлденендең түн тұрды.
Партияға сеніп ем, парасаттан жүрдай боп,
Пенделік жұмыр жүрегім парша-парша жыртылды.

Несібе аз жейтіндей жемісімнен бақтағы,
Қара сирақтан қапқандай қатігездік қақпаны.
Көсемге Ленин сеніп ем, оған да құдік сейілмей,
Ақыл-ойын асқар тау аяқтарға таптады.

Бозторгайдай шырылдаш шығарайын шынымды,
Басқа жаққа бұратын жолды ұмыттым бұрынғы.
Одағыма сеніп ем, опыр-топыр ойрандала,
Құрта жаздады дінімді, қырқа жаздады тілімді.

Таза жаннан басқаға титтей сірә таяп па ем,
Адалдықтың ауылын жүргендеймін аяп мен.
Қазақтарға сеніп ем, оянып от жағар деп,
Қуатындай бір-бірін өлі өңгір таяқпен.

Кілтипан көп заманда кісі сөзін кім ұқты,
Қашан менің қатарым бес саусақтай бірікті.
Достарыма сеніп ем, мөлдір мәңгі бұлақ деп,
Тұк те емес екен ғой лайландыру тұнықты.

Қайда, қайда қозғалған адамдардың жан-тәні,
Құбылмалы қоғамда қадірлі тек қалталы.
Ағайынға сеніп ем биік-биік тау ғой деп,
Өрмелесем өріне өзі аяқтан тартады.

Беттегенмін басына барқыт-белес төбенің,
Бауырымдағы балаға бұрылам да, өбемін.
Үміт жібі үзіліп үнсіз үйде отырмын,
Енді кімге сенемін, енді кімге сенемін.

ОСЫ МЕН ТУСІНБЕЙМІН...

Өр кеудеме өткізбен өкпек желді,
Таптау теріс мандайдан төккен терді.
Сұңқарға самғайтуғын сұқтанған бар,
Тұлпарға шабатуғын көп кедергі.

Күміс сәуле төгілсе өңнен жылы,
Көніл-шыбық шуақтан өнгендігі.
Көре алмау — көзі тұман көргенсіздік
Көрге тірі кіргізбес көргендіні.

Кісілер бар жаны — жаз, жарқылдаған,
Кісілер бар құдық суындей салқындаған.
Қызғаныш — қызыл иттей қызыл тілді
Қаппаса да қасында арпылдаған.

Екіге бөлінер кей кезде егіз жолdas,
Көкірекке кіл арық сөзім қонбас.
Терең жан түбі тұнғиық, ортаймайды,
Таяз жан туласа да теңіз болмас.

Кісілігі кішірейсе кім үнады,
Ку өңеші үшін де құнығады.
Торып жүр төңіректі түгел тінтіп,
Бақытымның бақшасының ұрылары.

Іркіліп, итерердей ісім кей күн;
Намыс буса найзағай күшіндеймін.
Отыма өзім жаққан, су құйған көп,
Осы мен түсінбеймін, түсінбеймін.

ӨЛЕҢМЕНЕН ҚАРСЫ АЛЫП АДАМ ТУСА

Ала таңнан аударар назарын кім,
Баяғыдан бар мейман базарымын.
Ежелден-ақ ұқсамас ешбір ұлтқа,
Ғұрпы ғажап қадірлі қазагымның.

Туған жердің тілдесіп, гүл, тасымен,
Той-думанда қуанып қырға асып ем.
Шаттық өлең шалқытар шілдехана,
Сәби туса сүйкімді інгөсімен.

Қасына дос, отауға бала толса,
Осал халық, емес-ау қазақ онша.
Жүргегінді жаулайды жоқтау өлең,
Қайыстырған қабырға қаза болса.

Дүйім елі қалмаған дүбір жақтан,
Кісліктің керемет шыңын тапқан.
Бір өлеңі тұн бейне тұнжыраған,
Бір өлеңі күн бейне күлім қакқан.

Қуаныш, қайғы қазагым көрген мәңгі,
Танысқаны қай кезде төрден қалды.
Өлеңменен қарсы алып адам туса,
Өлеңменен шығарған өлген жанды.

МӘНСІЗ ӨТКЕН КҮНДЕРІМ – КІЛ ӨКІНİŞ

Көркем дала көргенім жоқ тарлығын,
Иығымда тағдыр артқан нар жүгім.
Тәңірімнен тілейтінім таң атпай –
Текке өтпесе тірліктеңі өр күнім.

Қу заман да қанша рет құбылғандай,
Кейде тұн, кейде күн боп бұрылғандай.
Кешегі табыс тарта ма таразыны
Атқарам айтұлы іс бүгін қандай.

Келте ме қайран ғұмыр соншама тым,
Жан болсам жақсылыққа жол салатын.
Алтын уақыт бағасын арзандатпас,
Тырсылдап тыным таппай қол сағатым.

Бар менде зор сағыныш мұздатпаған,
Кісімін көкірегінде күз жатпаған.
Күн түгіл, сағат түгіл зымыраған
Секундтың сирағынан ұстап қалам.

Тереңіне ойлардың жүрем батып,
Көз алдымда жазира кілем жатып.
Мәнсіз өткен күндерім — кіл өкініш
Мәнді өткен күндерім — кілең бақыт.

КӨҢІЛ ДЕГЕН...

Өзек жармай тумайды өмірде өлең,
Сезім бе сел тасқынша төгілмеген.
Ауыздықпен алысқан көк дөнендей
Алып қашар өр жаққа көңіл деген.

Бұл тірлікте бақыт-ау бөлінбеген,
Бірікпеуді өзара өлім көрем.
Төңірегіңе тұтасқан тұман тектес
Тұнжыраса кей кезде көңіл деген.

Сұлу ой қашан сірә өрілмеген,
Кесек сөз кестеленсе көңілденем.
Жер жаһанды жайнатар кей уақытта
 Таңнан жарық тап-таза көңіл деген.

Араласам алысты өр үнменен,
Жан сарайым жайнайды, жеңілденем.
Көзіңе көрінбейтін кісіге ұқсан
Көндірер айтқанына көңіл деген.

ҚЫРЫҚТАН АСЫП, ЕЛУГЕ БАСЫП БАРАМЫН

Қара баласы ем құмдарын кешкен даланың,
Жалпак елімді аймалайды жанарым.
Уыстай алмас, уыздай тоймас уақыт-ай,
Қырықтан асып, елуге басып барамын.

Сайран өмір сусыныңа қашан қанамын,
Қазақтың сөзі қазынадай қазып аларым.
Қара нарға қара өлең жүгін арқалап,
Қырықтан асып, елуге басып барамын.

Демедім сірә дода-думанда дарамын,
Ұлағат үққан перзент сапына санадым.
Асуым алда, шашуым алда шашатын,
Қырықтан асып, елуге басып барамын.

Келеді кейде кеткен күнге де қарағым,
Женістерменен, женілістерден тұрар әр адым.
Қайран дүние қабағыңа сенің қарайлап,
Қырықтан асып, елуге басып барамын.

Нарығыңа да, намыс сөзге де нанамын,
Боздау бір белде бүгатындай ма бала күн.
Төменнен жылжып, төргі орынға озып тойларда,
Қырықтан асып, елуге басып барамын.

Жақсыға ылғи лаулап ап бірден жанамын,
Жаманға ылғи тамызық қайдан табамын.
Ізімнен жүрер інілер болса бір бақыт,
Қырықтан асып, елуге басып барамын.

БІР БАСЫНА БІР ФҰМЫР Да ЖЕТЕР-АУ

Табиғаттың тылсым сырын таба бер,
Жайлар жетер жүрегімде жара дер.
Бұқіл адам бұл дүниеде өлмесе,
Көтерер ме қара өгіздей қара жер.
БІР БАСЫНА БІР ФҰМЫР Да ЖЕТЕР-АУ

Куаныштан қалыңырақ мұң бүгін,
Алысқанда алып ұрар кімді-кім?!
Тіресуге, күресуге кіл тоймай
Тірідей-ақ жұтатындағы бір-бірін.

Ойласа өзін, өзгелерге қарап па,
Сана-қайық жүйткі алмай өлі артта.
Жеп қоятын жемі түгіл басқаны
Жыртқыш аңға айналардай заматта.

Отауының ашпайды өсте тұндігін,
Қарсы келсе қарайтындағы бір қырын.
Адамға адам гүл шоқтарын сыйламай,
Адамға адам кезенердей мылтығын.

Жүйрік уақыт жарқыл қағып аттай жел,
Сансыз ізді сандық кеудеде сақтайды ел.
Бір басыңа бір ғұмыр да жетер-ау,
Адам боп туып, адам боп өлмеуден сақтай гөр!

ЖҰМЫР БАСТЫ ЖҰРТ ІЗДЕГЕН СОЛ БАҚЫТ

Тамылжып-ақ таңдандырар таң керім,
Шөлдегендей сұлу жырға, әнге елім.
Асқақ ойға сәл тимеген төбесі
Қостанайда бір пәтерім бар менің.

Берген сертке берік тас боп тұра алу,
Ғажап, ғажап жақын жанмен жұбану.
Махаббаттың аппақ гүлін аялар
Мәңгілікке мен сүйетін бір ару.

Бір ұлым бар лапылдаған үмітім,
Болашағын бағдарлаймын күні-тұн.
Көргім келер тұлпар мінген тұстарын,
Шабандардан шалғай жүрсе жігітім.

Бір қызым бар маған ыстық оттан да,
Көп ұқсаған көл жиегінде көк талға.

Дәл қасымнан қанаттанған қарлығаш
Саңлағымдай самғап ұшпай тоқтар ма?!

Бір диплом Алматыдан алғаным,
Білімге мен ғұмыр бойы қанбадым.
Академия бітіргендеймін бір түрлі
Ақсақалдармен қоршалған соң жан-жағым.

Бір қызмет маң-маң басып барадым,
Бір бастық қой кешке дейін қарадым.
Тапқаны аз ба тақырыпты таңдаса,
Ақ қағазда жорғалаған қаламым.

Бір жалақы маңдай термен тапқаным,
Бөгде есікті бұрылып та қақпадым.
Қай жақтан да сүйк соғар сумандап,
Маңайламас алақанға мақта күн.

Байқайсыз ба бәрі менде бір-бірден,
Бала текстес шын қуанып, шын күлгем.
Жұмыр басты жұрт іздеген сол бақыт
Көптен бе өлде, аздан ба өлде кім білген?!

ТОҒЫЗЫНШЫ ҚАБАТТЫҢ ТҰРҒЫНЫМЫН

Сұлу таңнан сағынғам бұлбұл үнін,
Сауылдата құямын жырды бүгін.
Тұғырына қонатын қыранға ұқсас
Тоғызыншы қабаттың тұрғынымын.

Күндіз түгіл, кәдімгі тұнім жарық,
Қайран заман құндыздай құбылды анық.
Ай да алыс еместей армандаласам,
Жұлдыз маған жақындар жымың қағып.

Мекен-жайға мерейлі оралар құт,
Қадамыма қарайды құп алар жұрт.
Алып бергім келеді аруыма
Ақша бұлтты ақ шәлі орамал ғып.

Алабұрта алысқа қараса адам,
Биік, биік үшқанда жарасады ән.
Еңкеймеші үйімдей енді еңсем,
Аласадан аулақпын, аласадан.

Қаламсабым қолдағы қара күрек,
Қайда мені апармас бала-тілек.
Талай досым тартады тәтті өзілге,
Тек қана ақындардың қабаты деп.

Сүт сөулеге аспаннан кезігемін,
Тылсым түнде тыныстап, көз ілемін.
Бір күн ғарыш-өлеңге самғататын
Байқоңырым сияқты сезінемін.

Сұлу таңнан сағынғам бұлбұл үнін,
Сауылдата құямын жырды бүгін.
Тұғырына қонатын қыранға ұқсас
Тоғызыншы қабаттың тұрғынымын.

ҚАРА ШАЛ

Көктемменен әмәнда көктемей ме гүл ерте,
Еркеледік үлкенге, еркеледік мың мәрте.
Қаталдығын шалдардың сәлем бермей байқап көр,
Осалдығы шалдардың бізді өсірді тым ерке.

Домбыранды қолыңа ал жанымды енді әлдиле,
Атамды мен ансаймын, елендеумен әр күйге.
Кей сөздері шалдардың сазды естілер бір әуен,
Кей сөздері шалдардың шаттығы мол әр бейне.

Өмірлікке баулиды дерсің сонда шын алмас,
Шалыс басса аяғың ақыл айтпай тұра алмас.
Сөздерінен шалдардың талай дастан туындар
Өздерінде шалдардың мықтылық бар мұқалмас.

Ұстамаған шақтар ғой қаламды да қолға әлі,
Ұмытпадым әлі мен ақылыңды сондағы.
Ардақтысың алдымда, өшпейтіндей сол тұлған,
Ерте кеткен әкені жоқтатпасаң болғаны.

АУЫЛДЫҢ АҚСАҚАЛДАРЫ

Бейнеттен жанған бағы
Бал-бала алданғаны.
Думанды ел — діңгектері,
Туған жер тарландары,
Ауылдың ақсақалдары.

Ұлайым ісі мықты,
Ұмнан-ақ түсініпті.
Сөлеміңе сөл бұрылса,
Салмақтайтын кіслікті
Ауылдың ақсақалдары.

Ойланбай отыра ма,
Көз тастар атырабыма.
Бағынған бір Аллаға
Табынған топырағына
Ауылдың ақсақалдары.

Жок құйттай қаталары,
Тәттіден татар өлі.
Даладай дастарқан сәні,
Дария баталары,
Ауылдың ақсақалдары.

Сезім боп тұна қаппын,
Саулығынды сұрамақпыш.
Ұл-қызыға ұядагы,
Ұлы мектебі ұлағаттың
Ауылдың ақсақалдары.

Қатігездік қашық әмән,
Мейірімі щуақ шашыраған.
Темірдей төзімді тұлға
Алтыннан асыл адам
Ауылдың ақсақалдары.

Кіл жақсыға күй ақтарған,
Кіл өртенген үяттардан.

Қарайып жүргенінің өзі
Қарлы Алатау сияқтанған
Ауылдың аксақалдары.

ҚАБІРІҢ ҚАЛДЫ ӨЛЕҢ БОЛЫП КУБІРЛЕП

(Әкеміз Оразбайдың бейіті басына барған соң
тұған жыр)

Орайы келсе ортада әсте от баспа,
Ата-анадан артық адам жоқ басқа.
Көз алдымыздан көрінбеген соң көкеміз
Көп қарайладық күзетшіндегі көктасқа.

Айқайласам ақын даусым жетер ме,
Асыл әке, әлі үнсізсің бекерге.
Әзек жарған өсиет сөз де айтпадың
О дүниенің отауына өтерде.

Бейіт жаққа бұрылмасаң ірі айып,
Жұма сайын келіп, кетіп тұрайық.
Басынды бір көтермейсің бе, өр көке
Басында тұр бала-шағаң мұңайып.

Жемқорлықтан жиіркендік көмейлік,
Аманаттан алшақ бассақ не дер жұрт.
Сен кеткелі шаңырағында шығын жоқ,
Сен кеткелі кәдімгідей көбейдік.

Шыбық емес, шын бәйтерек заузатың,
Шарықтады, қалықтады тауға атың.
Раушаны жайнап-ақ тұр жанында
Естисің бе, жалғыз емес Талғатың.

Әкеменен әдемі күн алыс қап,
Ант етеміз парыз өтеуге нан үстап.
Ауыл молдадан абыройсыз емес Амантай,
Аруағыңа күніренте құран бағыштап.

Қарттың жоғы қиналғанда білінбек,
Табиғат Заңы түсінуге тұр үндел.

Жас отауға жаңа бата бергендей
Қабірің қалды өлең болып күбірлеп.

ӘЛІ КӨТЕРГЕН ӘЛДІ ҰЛЫҢМЫН

Көпшіл көңілім көпті сағынды,
Жеткіздің қайдан жоқ құса-мұнды.
Онаша қалсам ойлай беремін
Орайтын ылғи от құшағынды.

Аңы сөзден ауырған көп,
Тәтті сөйлер тәуір жан тек.
Айтатынсың өкпе жоқ деп,
Айтатынсың бауыр бар деп.

Шалғай жүремін шандардан қапқан,
Шуақты жомарт жандардан тапқам.
Айырбастайтын адам таппадым
Алақанынды арқамнан қаққан.

Киелі жер көркем-белі,
Кіл көрсеткен өрден сені.
Ойлағаның он ұл-қызың
Ойламадың он теңгені.

Ауызда құр насыбай ма еді,
Асылды неге тастайды елі.
Шешендік сөзден жарыс болса,
Шаптай алдың бас бәйгені.

Өтті, кетті гүл бір заман,
Түссе есіме тұнжырағам.
Жоғары білімің болмаса да,
Жоғарыда жүрдің әмән.

Қалайша қанат қақпайды ұлы,
Қара шаруа — бак, байлығы.
Жайқала өстік жапырақтарындей
Адалдықтың аққайыны.

Сәнді бақтағы таңғы гүлмін,
Сен арқауы — мәңгі жырдың.
Әке деген құдіретті сөзді
Әлі көтерген әлді ұлыңмын.

АДАМДА АДАСТЫРМАС СЕНІМ БОЛСА...

Жасынан жалын сөзді өсті ортада,
Көп көсем сиынғаны, достар пана.
Ақырын көзін әкем жұма берді
Ар-ождан — партбилеті төс қалтада.

Дүние дөңгеленіп дүбірі көп,
Улкенге өткендей ме ірі іні бол.
Салқынын сездірді ме сол билетке
Суыған сүм ажалдан жылы жүрек.

Келмеске кеткен жоқ па небір кісі,
Келеді екі көздің егілгісі.
Неткен бұл ұқыптылық ұрпаққа ұнар,
Неткен бұл санадағы сенім күші.

Құшағын құнды іске қанша жайған,
Төгілген тамшы тері дәл самайдан.
Қалтада қағаз, қалам, ақша емес,
Қалтада қымбат құжат қаршадайдан.

Алыптың айтқандары жеңіл қонса,
Ескі жол елеңдетпес елінді онша.
Өзіңмен өз кеуденде өледі екен
Адамда адастырmas сенім болса.

КӨКТЕРМІН БАСТА ҚАЛҒАН БАТАҢМЕНЕН

Қай кезде, қай сөзінді қата дедік,
Сағыныш саған ылғи жатады еріп.
Тұндері тұсім ғажап, ісің ғажап,
Отырсың ортамызда бата беріп.

Көгілдір көк аспанға төбем жетіп,
Тостаған көз төнбейді төменге тұқ.
Қаймақтай қара сөзді сапырасың,
Сонан соң сұлу жырмен өлеңдетіп.

Маржаның тереңінен таңдал алып,
Мейірің айтқан сайын қанбады анық.
Имамдай иландырдың лебізіне,
Ақындай адуынды арқаланып.

Көргенмін көреген кісі пайдасын көп,
Мақалды мың құлпырта айтасың дәп.
Оқыстан ояндым да, айқайладым
Жан әкем жанымда емес қайдасың деп.

Тірлікте кейде мәнсіз күндер өтпек,
Таяз сөз тағылымсыз кімге жетпек.
Қазына-қария ізден күбірледім,
Жан әке сенің жөнің тым бөлек деп.

Дәм-тұзың таусылды ма татам деген,
Ендігі еңселі шың апам көрем.
Жайқалған жауыннан соң жасыл шөптей
Көктермін баста қалған батаңменен.

ТУҒАН ҚАЛА

Көрмеген диқан тойы тарқап әлі,
Даласы сияқтанған даңқ алабы.
Құлпырған қыр төсінде Қостанайым,
Ақ нанның атасындай Арқадағы.

Тұлғасын туған қала танып көрсін,
Жүзіне жыміған күн жарық берсін.
Қараған қабатты үйден құрылышы,
Бар адам бас иетін алып дерсің.

Шақырып шаттығына тұр бақтары,
Тағынып шоқ гүлдерін үрпақ тағы.

Әлділер әуенімен Қостанайды
Кіл алып зауыттардың ырғактары.

Ерлік ту ел көгінде құламаған,
Кызырып құшағымда тұрады әман.
Әліби жорықтарға жүрген жердің,
Әр үйі мұражайдай мына маған.

Айқайлап жыр оқысын ақын — дала,
Айналсын суретке сағым ғана.
Қанаарман ұл-қыздардың құт мекені,
Қанаарман бұл Қостанай батыр қала.

ДӘН ИІСІ

Аспанның асты ақ алтын,
Қамбаға қаптай құйылған.
Лапылдайды жанар-күн,
Тулайды өлең — түйір дән.

Алқапқа астық ағылтып,
Адамдық ғажап сый үшін.
Самалдай соққан сағынтып,
Иісін-ай, иісін.

Шабытты қимыл қайда да,
Шалқымай қалай басылам.
Диқан ата жай ғана,
Сипайды дәннің басынан.

Мерейге мені ораса,
Құлімдеп күндей нұрлансақ.
Өлеңмен қалған оңаша,
Ақынға үқсап тұрған шақ.

Сәнісің бе көп қырдың,
Әнісің бе өрімек.
Аймалайын деп тұрмын,
Айналайын дегім кеп.

Жібек жел де желпіп тұр,
Диқан тойын бастарда.
Иісіңе елтіп бір
Іілмей кеткен бас бар ма?

Комбайнға жүр, міндік,
Күн менен дән сүйіспек.
Өмірімде жүрмін тік,
Өзінді ғана иіскеп.

ДИҚАН

Нұрына таңның шомылып,
Нұрланып өткір жанары.
Несібелі мол үміт,
Нанға айналып барады.

Тың төсінде жол ашқан,
Тоғыса қалып көп тілек.
Көңілі — ашық көк аспан,
Көсілген дала — от жүрек.

Жандарсындар меймандос,
Жылу тосып жүремін.
Дәріптерім диқан дос,
Дән-теніздей тілегім.

Қауырт қымыл шақ тумай,
Қасиет сіңбес қандарға.
Дидарым менің ақ бидай,
Диқан барда, наң барда.

Моншақтатып тер құйған,
Сөулесін сеуіп күн ғана.
Даласыз жетім ер диқан
Диқансыз жетім бұл дала.

ЫБЫРАЙДЫҢ МЕКТЕБІ

Көміліп көк шалғынға дала көктеп,
Шуағын алақанда ала жетпек.
Атымен Ыбырайдың асқақтаған
Ассалаумағалейкум ата мектеп.

Агады алға қарай бұлак-білім,
Жас ұлан жағасында құрақ бүгін.
Бағбан баласымен бақытты деп,
Тұрғандай сүйіншісін сұрап күнім.

Күлімдеп келгенінде маңыма күн,
Ыстық бір жүректерді сағынамын.
Қазақтың қаулап өскен біліміне,
Шымылдық шығарсың сен шаңырағым.

Саяхат жасап қойып бала шаққа,
Шәкіртке шын сүйсініп қарасақ па.
Білімнің көш бастаған кемесің.
Жүзे бер жүзі нұрлы болашаққа.

КӨКІРЕГІМ – ФОТОАППАРАТ

Жылу құяр ішіме күн,
Жол бойында жота қалад.
Көремін де түсіремін
Көкірегім – фотоаппарат.

Тылсым тосын тәңірегі,
Тәңкерілген көздер қарап.
Өзен жібі өріледі,
Өңім менің өзгерे қап.

Неге жүрек жыры бітпек,
Неге бүгін көктемдей күн.
Солтүстіктен сыйылып кеп,
Оңтүстікке жеткендеймін.

Жүзем өмір өзенінде,
Жылы құшак дала жаяд.

Самал лебін сеземін бе,
Синоптикке қарамай-ақ.

Жүрек сөзі тұнад тағы,
Жолында жыр, жолында ырғак.
Қалып қойған қыраттары,
Қыз қылышпен қолын бұлғап.

Ерекшелеу ел баяғы,
Ерек сезім таратамын.
Шұғылалы жер жаяды,
Шуақты аппак алақаның.

Бүйра-бүйра белдерін-ай,
Бүгін шеккен түйелердей.
Еңсесі бөлек ерлерін-ай,
Әр шаңырақ киелі елдей.

Қанда ойнап қосылған сыр,
Құшактарды құрамай ма?!

Тосын барып, тосынан жыр,
Тулайды кеп тұла бойда.

Жылу құяр ішіме күн,
Жол бойында жота қалад.
Көремін де түсіремін,
Көкірегім — фотоаппарат.

КӨКТЕМ КЕЛДІ

Көктем келді... құлын-көңіл шапқылап,
Қыраттардан қанаттарын қақты бақ.
Жан-жануар тіршілікке тым ырза
Нақышы бөлек нұрлы өлке нақ тұрак.

Көктем келді... Сел-сезімім тоқтамай,
Көгілдір тұске бояла қалған көк қалай.
Батқан күні барқыт көрпе бейне бір,
Атқан таңы айналама төкті арай.